

四庫全書

集部

欽定四庫全書

宋元詩會卷九十七

兵部主事陳焯編

錢惟善

字思復錢塘人至正辛巳鄉試出羅剎江賦鎖院
三千人皆不知錢塘江為曲江惟善援据舊聞鋪
叙詳挾因此得名官至副提舉張
氏據吳遂不仕退居吳江之筒川

篆冢歌

有序

雲間善篆以所書瘞之細林山中題曰篆冢爰來徵

詩遂賦長句以寄

雲間者朱希孟辨也又見董佐才詩

包羲卦畫龜龍出頡頏造書鬼夜泣俯觀鳥獸迹
依類象形文字立以迄五代咸東封改易殊體靡有同
周官保氏教國子六書大義開羣蒙太史籀文古少異
小篆從省由秦始皇倉頡爰歷博學篇三家著述初傳世
秦燔經籍訟獄熾乃當隸書趨約易古文雖絕漢章行
尉律學童仍課試東閣祭酒太岳孫夙嘗受業賈氏門
憫悼俗圖昧所向博采籀古加討論揭示上下明指事

轉注假借形聲意立一為端吏畢終分別部居不雜廁
亘千萬古知字原昭若列星麗躔次中興斯學曰陽冰
入室操戈何背戾二徐訓釋浩江河仲也祛妄言不頗

徐楚金著祛妄
辨李陽冰之誤

吳興張有爾傑出復古正俗訂舛訛布

衣道士錢塘住玩世端如郭忠恕三十六舉僅成篇蟬
蛻遺蹤不知處席中如帶惡安西鼓皮離禹良可吁漢
家去古尚未遠成皋印文猶重摹雲間苦嗜古手校科
蟲辨魚魯明窗靜几風日佳臨模一掃千番楮商彝周

鼓真吾師蟠匾沈著沙畫錐鸞迴鳳翥龍夭矯長戈短
劍相交馳書草日積充屋楯保愛何啻壁與珪細林山
中一坏土紉笈緘膝重閉之於乎襖帖藏玉匣終致溫
韜舉來挿亦恐虹光夜燭天定有竊開窺筆法冢頭草
鳴寒蛩蠶文瘞筆同高風後三千年見白日好事應營
馬鬣封

送達公之京

龍飛天子中興年使者弓旌集俊賢闔闔早朝班玉筍

瀛洲夜直賜金蓮五經同異須劉向三絕才名數鄭虔
黼黻當年遺老在長歌黃鵠送樓船

題清逸齋

神仙官府曾為吏一日乘風即掉頭太白豈惟凌鮑謝
元卿只合友羊求門前種樹雲連屋湖上聽潮月滿樓
遙憶五經名隱地峨眉高聳蜀天秋

送賈元英之照潭

照潭遙望九華山弓馬蕭蕭日暮還夢裏無題惟寄內

胸中有策欲平蠻，落花閉戶眠黃犬。明月開籠放白鵬，絳灌何曾輕賈誼。早隨鸛鷺入朝班。

故宮春望次平禹成韻

登臨休賦黍離章，千里江流接大荒。劍鎖血華空楚舞，鏡埋香骨失秦妝。薜蘿山鬼啼螢苑，荊棘銅駝卧鹿場。寂寞萬年枝上月，夜深猶照舊宮牆。

喜白髮為陳師復賦

勲業無成散似樗，青銅欣見二毛初。中郎興動秋風起。

太傅詩成壯歲餘
皎皎易汙時一沐
星星難染漫千梳
等閒得此無情物
自有忘憂滿架書

張天英

字楠渠溫州人徵為國子助教
再調皆不就遊西湖多居異下

武陵春曉曲書於玉山佳處

武陵春曉花冥冥
漁歌蘭棹搖殘星
溪涵山氣綠如酒
幽禽啼破松煙青
天上時聞鳳皇曲
金門飛夢人初醒
長嘯銀臺月將落
空翠著衣香霧薄
忽見安期蓬海東

佩劍從風降玄鶴陽烏銜火縣扶桑袖卷紅雲朝帝旁
手攬龍車覩天光下視蟻國空千霜

金陵行

金陵城頭生紫煙金陵水立東風前神山蜿蜒行入海
白日化龍飛上天十年不見吹簫侶丹鳳深巢惜毛羽
仙子天端騎鳳來衣上斑璘碧桃雨碧桃如霞浮壽觴
秦淮之鯉數尺長林鳥回翔集庭樹華峰特立天中央
君行出門無百里中道嗷嗷塞人耳霜風洒筆山岳搖

夜半飛章奏天子

前有尊酒行送朱秀方之慈溪

晴窗一夜梅花開天風拂拂從東來
僊人乘風忽相遇飄然便欲歸蓬萊
且盡花前一樽酒玉簫瑤瑟重相催
與君俱為異鄉客請君當歌共銜杯
共銜杯惜君別明日西陵浪如雪

思陵石詩

黃帝騎龍去不還玉笙鶴上北風寒
孤臣獨有心如鐵

斷石鐫詩泣露盤

夏日寄玉山

赤日行天氣欲焚樹根羣蟻正紛紛
道人心在羲皇上
睡殺青松一枕雲

于立

字彥威南康之匡廬人學道會稽山中
得石室藏書放浪自喜常館顧阿瑛家

釣月軒

夕息西軒陰頗愜濠上景持此月明鉤
投竿釣清影流

螢飛暗度幽鳥栖還警遊鱗亦復來露下芙蓉冷

至元戊寅四月十九日風雨大作邨民以為龍王

嫁女予作詩以紀之

西方龍君嫁龍女雷車彭彭載風雨神奸夜邀髑髏語
碧草無光愁露渚鮫人獻綃珠淚泣鸞裾行煙翠痕溼
阿鬟嬌小不成妝帝與桑田湯沐邑懸脂紫土吹海腥
陽侯擊浪玻璃聲湖邊地皮薄如紙長堤捲作長河水
夜夢陳敬初與家兄

我來與君同作客前年共住江邊宅君騎快馬事遠遊
我亦流離去鄉國君家慈親猶未老眼前骨肉仍相保
三人兄弟何人強之子文章最稱好我家老兄浙水濱
老兄兄弟家尤貧五載零落不可見迢迢歸夢還相親
人聞夢中相爾汝旁人不知夢中語起來明月滿虛庭
丹楓墮影天霜雨秋風江上生白波秋江蕭蕭鴻雁多
遲君不來知奈何

擁翠堂詩卷

幽人結屋江邊住，俗聲不到題詩處。
門前惟有樹扶疎，檐間只許雲來去。
落花如雨東風狂，綠陰滿地春茫茫。
一聲啼鳥驚夢破，翠屏淺印煙峰長。
海綃輕薄煙霏暝，空碧無痕湛清影。
天風吹落竽籟寒，嵐光溼透衣裳冷。
我生已有遺世心，便欲長往窮幽尋。
微茫樓觀不可到，雲林冥冥苔碧深。

秋夕得雨字

七月涼颼初破暑，秋聲蕭蕭在庭戶。
清新故人忽見過，

契濶有懷何足數西夏郎官好詞翰中州美人妙歌舞
縣知野衲解談天況有仙人能喫雨金刀削翠藕絲長
綠房破繭蓮心苦詩成脫穎或有神酒令分曹聊可賭
慙慙素手累行觴瀟洒清談藉揮塵紛紛市上聚蚊兒
昌黎先生歎如土

漁莊

二月春水生三月春波濶東風楊柳花江上魚吹沫放
船直入雲水鄉蘆荻弩芽如指長船頭濯足歌滄浪蘭

杜吹作春風香得魚歸來三尺強有酒在壺琴在牀長
安市上人如蟻十大紅塵埋馬耳漁莊之人百不理醉
歌長在漁莊底

次韻玉山

過雨收殘暑西來水似天秋風生柁尾明月落尊前慘
淡依山寺敲斜下瀨船清歌不成調思爾枕書眠

次韻泊閭門

淥水秋風蕩漿船白蘋洲上月初弦清光半入紅窗裏

照見羈人夜不眠

題墨雁

黃沙衰草雪毵毵八月天山冷不堪昨夜朔風吹過影
盡將秋色到江南

題振轡馬

渥洼龍馬進來時奮迅長鳴不受羈詔與從官調得好
只教隨仗不教騎

題墨竹

先生舊隱鑑湖曲無數琅玕繞屋生蕭蕭六月動秋思
不是風聲即雨聲

巴延子中

原西域人以祖父任江西遂家於進賢縣判官辛
好禮為築宅北山之嘯臺子中官吏部侍郎元亡
潛居故山明洪武初以禮
微之作七哀詩飲藥而卒

過故居

白頭歸故里荒草沒柴門鄉舊仍相見兒童誰復存忠
清千古事骨肉一家魂痛哭松楸下雲愁日欲昏

春日絕句

幾片殘紅點客衣
小溪流水鰕魚肥
畫橋盡日無人過
楊柳青青燕子飛

袁華

字子英
崑山人

拜石壇詩

仲瑛嘗于東城菴假山廢基得一石上有蘇子瞻題
識石理瑩潤類壁雖左旁缺損然尚奇甚博士柯敬

仲見而奇之再拜題名而去字曰拜石御史伯頁達
兼善為作古篆書之後仲瑛偶得子瞻答維揚王忠
玉提刑飲快哉亭帖與石上題識相合仲瑛謂此石
即忠玉家快哉亭物也特不知何以至此仲瑛遂為
記其事倩朱伯盛刻之他石而與河南陸仁汝南袁
華各為詩咏之

眉山三蘇宋儒宗長公矯矯人中龍南遷儋耳西赤壁
文章光燄超洪濛快哉之亭雪初霽領客登覽山川雄

自云平生不解飲胡乃一舉觥船空和詩寬限見真率
鑿崖題石摩蒼穹功名富貴一丘土斷碑殘素傳無窮
吁嗟異物神所衛玉山合璧俄相逢奎章博士丹丘翁
江南放逐驚秋風見之即下米芾拜二顛癡絕將無同
築壇山中加愛護樹以松桂連椅桐雨窗雲戶溼寒翠
朝闌暮楹開青紅白野御史龍頭客青年獻賦蓬萊宮
戲將禿穎寫螭匾斷釵折股流星虹只今風塵暗河嶽
王侯第宅皆蒿蓬牙籤玉軸映紫素好事獨傳吳顧雍

婁東朱珪鐵作畫字字玉屈蟠蚪蟲嗟哉昔人今已矣
慘淡故國風煙中如何二子復嗜古策勲儒墨收奇功

吳訥

字克敏休寧人少學兵法習騎射從其父總管吳
禮官靖江收復蠻洞至正末用薦授建德路判官
兼義兵萬戶屯湖西扎溪源禦明兵戰敗不屈
而死時年二十有七遺詩五卷為吳萬戶集

破紅巾

君不見斬黃兒紛紛白馬張紅旗去年陷湖北今年陷
淮西遂令深山之民皆帶甲四海瀕洞含瘡痍堆金積

玉亦何有略地攻城徒爾為又不見黃連寨左帶溪山
右淮海天兵如日照雪霜百萬紅巾一朝敗親王按劍
定中原丞相分兵救吳會邊人不識韓將軍極口爭誇
鐵元帥八座東開昱嶺關羣偷欲度愁躋攀奇兵間道
絕歸路可憐白骨高如山桂林老臣再徵起坐鎮西垣
幾千里昨聞餘黨犯具鋒血作龍沙半江水南方猺獠
勇莫當自謂效義收蕪黃賊徒一見驚喪膽堅壁不出
知天亡諸君力盡在此舉巢穴不平鼠為虎相期麟閣

畫丹青却憶虞廷舞干羽

楊鐵厓曰克敏謁予出其所為詩予奇其人適垣府相臣

招致名士講及三闕之事克敏慨然有擊楫中流之思未幾遂統士會諸軍於昱闕予聞而益奇之其才勇忠義實得於天性則知嚮所為詩皆筆牘之餘耳

戰昱嶺闕

鼓角聲雄隊伍齊
揚兵曉戰昱闕西
黃金匣動雙龍出
赤羽旗開萬馬嘶
露布不煩諸將草
詩篇還效古人題
沙溪春酒甜如蜜
醉卧花陰聽鳥啼

張簡

字仲簡吳人初師張伯雨為黃冠隱居鴻山元季兵亂以母老歸養仍返儒服顧仲瑛稱其詩簡澹能得陶韋之神

送王子充歸金華

春入長洲苑東風已及時苑中垂楊樹吹作黃金絲送君出春城艤舟折柔枝以此聊贈遠相別仍相期君歸金華山當逢牧羊兒母因入山去遂爾來遲遲楊柳飛花日待君同賦詩

次韻田秀才見寄

樹杪青蟲晴颺絲春城風物似年時
貧餘許邁餐金法
閒有陶潛飲酒詩芳草青青連野濶
征鴻歷歷度江遲
長洲故苑煙花外千里懷人入夢思

饒介

字介之臨川人自翰林應奉出僉江潮廉訪司事
張氏入吳杜門不出士誠慕其名自往造請承制
以為淮南行省參政家采蓮涇上日
以觴咏為事吳亡俘至京師死焉

送秦文仲博士還三沙

東望大瀛海影落扶桑弓三洲直如矢正射三山中三

山負曉日曉日波浪紅仙人不騎鶴所適多御風秦君
家三洲長與仙人通即之不可見忽爾能相面翩翩頭
上巾舉舉塵中扇高談清海暑知子不貧賤閒居寡良
儔有酒不自薦此日亦足醉况得邦之彦小醉須解醒
大醉不用醒平生慎許可祇有一劉伶太湖三萬頃七
十二峰青頗怡山水秀閉門修酒經白雲生硯石疎雨
洒窗櫺子上三洲去手杯猶未停

病中對梅花一株欣然有作錄似西塾孟載季迪

兩先生一笑

病中雅量豈堪論
澄水能清撓即渾
除却妙香無長物
祇應靜坐洗煩言
幾叢晚菊今耆舊
一樹寒梅老弟兄
曾住鍾山安石墅
旁人猶恐我爭墩

夜坐

學默三年漫不磨
流光一去意無徵
緣如髮白因循染
道似山青自在凝
猶有形骸生影迹
却將文字寄名稱
一川月色多于水
更著秋霜見底澄

陳秀民

字庶子溫州人博學善書至正中為武岡城步巡檢知常熟州張氏時為江浙行中書省參知政事

翰林學士後
莫知所終

送彊彥栗歸吳

薊門秋月白城頭夜啼烏城中良家子半是南征夫或
從張都護或屬李輕車道傍別妻子泣下如迸珠自非
英雄具孰使禍亂除戎馬暗中國遊子將何趨君歸慰
父母繫我獨何如

燕京客舍送友歸天台

雁鳴沙漠風秋入燕陵樹客子衣裳單寧不畏霜露驅
車國東門迢迢懷往路尺璧橫道周誰能一回顧登山
豺虎雄入海鯨鯢怒天台隔三江丹霞夾玄霧黃精或
可尋胡麻庶當遇明時有遺佚歸哉保貞素我馬病已
久東西厭馳驚逸駕如可攀吾將執其御

送遠曲

誰令車有輪去年載客西入秦誰令馬有蹄今年載客

過遼西車輪雙馬蹄
四念君獨行無近侍
婦人由來不下堂
側身西望涕沾裳
恨不化為雙玉璫
終日和鳴在君旁

至岳州宿岳陽樓

蕩漿源流光登樓望
八荒江山出圖畫
天地入舟航
夜靜星文動
秋高月色涼
題詩懷李白
搔首鬢滄浪

山居雜咏

好山看不盡
遊罷更須登
石屋晴猶雨
天池夏亦冰
尋

仙碧霞裏飛步白雲層松花飄滿地歸路喜逢僧

邳州

青山一髮見邳州落日雲迷故國愁父老空傳黃石在
仙人已伴赤松遊乾坤不信無清氣河水胡為尚濁流
野樹昏鴉栖未定數聲哀角起高樓

寄紹興呂左丞

後來江左英賢傳又是淮西保相家見說錦袍酣戰罷
不驚越女采荷花

輟耕錄云張氏據有平江部將呂珍
守越參軍陳庶子饒介之在左右一

日陳賦此詩饒染翰題扇以寄呂詞翰雙絕呂倩人誦
罷大怒曰我為主入血戰守封疆豈愛一女子不惡驚
乎見則必殺之

劉仁本

宇德玄天台人以進士業中乙科歷官江浙省左
右司郎中至正庚子仁本治師餘姚作雩咏亭集
名士四十二人修禊賦詩
髣髴蘭亭稱一時盛事

戍婦吟 二首

夫君在邊戍妾身守孤幃欲往備紉櫛不如頻寄衣衣
到恐遲遲不到妾不知欲知衣到未明年鴻雁歸

將軍功未成持牛勞軍士將軍豈無家為妾語夫主勿
為賤妾生寧為將軍死賤妾欲從之軍中無女子

蕨其行

東山有蕨其南山有蕨其西山有蕨其北山有蕨其采
采蕨其晨露未晞荆棘離披筐筥攜持長鑱溪入土短
褐寒風吹采采蕨其可以療饑以簋以炊為飴為飴食
少不下嚙食多傷人脾去年歲歉食無糜橡栗拾盡民
流離今年歲歉田無稗蕨其食盡將安之美食大官饌

仁心寧汝悲但見昨日秦麥兩岐今日進五色芝呈祥
獻瑞無休時載膏載脂驛騎驅馳蕨蕨其官獨不汝
知已而已而歲云暮矣

方行

字明敏黃巖人官參知政事於江浙行省或以為方谷真子未知是否具詩名東軒集

贈虛中上人

一室安禪久三生結願頻傳經來帝子送食下天神水
月虛空相山雲自在身慈航如可渡應許姓龐人

登秦住山

此地曾經駐蹕來秦皇遺跡尚崔嵬
採窮滄海無靈藥歸到驪宮有劫灰
萬里黑風迷鬼國一杯弱水隔蓬萊
詩人弔古應多思落日高丘首重回

送賈彥德訓導霍山

中都會面得從容兩載同聽長樂鐘
天近君門嚴虎豹地寬人海混魚龍
承恩自合歸宣室論道安能老辟雍
江柳春花增別恨白頭何日更相逢

趙善瑛

字廷璋成都人八歲能詩長而潛心六籍教授鄉里至正癸卯明氏據蜀隱居樂犢山中迨蜀境內附後徙家錦江卒年七十有八

錦里卜築詩

錦里幽栖處悠然遠俗囂地偏車馬少山近市城遙松竹連蹊徑藤蘿掩屋茅閉門窮典籍修業問蒨蕘見小悲蛙窗忘機夢鹿蕉白頭宜此樂青眼莫相嘲種菊開三徑橫琴咏九皋黃葵舒永日紫芋待終朝守道居顏

巷嫌喧棄許瓢薄田多種秫平阜廣栽蕎鵝鴨遊溪沼
牛羊牧近郊芝蘭香滿砌枸杞翠連垣採藥攜輕筥觀
蓮從小舫考槃時諷誦得句自推敲丘壑從茲穩弓旌
謾遠招茗甌供伏臘土簋薦溪毛牧子吹羌笛仙童品
玉簫南山曾採蕨左手慣持螯麋鹿為新侶松筠是故
交煙霞情浩浩詩酒樂陶陶寵辱都忘却功名盡已拋
唐虞今在宥許我學由巢

吳志淳

字主一無為州人以父廕歷官靖安都昌二縣簿
濠泗兵起徙家豫章又遷居鄆之東湖秦除待制
入明初遂不仕以終

兒牧牛

兒牧牛豐林清潤縱爾遊長鞭短策莫輕舉從渠飲啗
飽即休老幼年仰衣食耕種田園藉牛力早夜單衣
自飯之祗恐春來或牛瘠日日丁寧語牧兒老翁餉爾
當及時籠禽吹笛任相學慎勿將牛常苦咎牛不耕田
廩無粟淮上三年食人肉

夏日園中清暑

青山地僻車馬稀一載倦游歌式微傍溪卜築面流水
拂石展簟消炎暉老翁過從就蔬食幼女補綴成絺衣
西亭去家苦不遠日暮共逐漁樵歸

陸居仁

字宅之華亭人以詩經中泰定丙寅鄉試隱居教
授自號雲松野褐與楊廉夫錢思復遊歿同葬于
山東麓號
三高士墓

楚人弓

楚人弓縣兩石五十萬矢陷疆敵絳人弓箭三隻長歌
入關成偉績多箭不如少箭力制敵若在弓矢間鳴條
牧野高於山

國馬足

國馬足吉行五十轡如沃天馬足一日千里更神速國
馬天閑飽芻粟太行鹽車天馬哭

張樞

字夢辰陳留人徙家華亭築室曰讀書莊與諸弟
唱和為樂兼工行楷陶南村贈詩云幅巾短杖林

和靖斗酒長篇李謫仙又云讐書竹簡拈辭碧臨
帖箋藤寫硬黃可想見其風致也貝瓊作傳云夢
辰居華亭之城東門日與子弟數十人講春秋或
勸之仕不應人是以高之曰林泉民年八十餘乃
終

送友之戎幕

金吾上將開東閣白髮參軍起曲阿嚴武故人唯杜甫
馬周知己獨常何龍蛇久鬪纏兵甲鴻雁高飛避網羅
慷慨平生兩行淚哀時更比別離多

秋興

百戰關河血未消將軍誰是霍嫖姚
中原版蕩悲周室西楚紛披屬漢朝
甲帳珠簾非昨日玉樓金屋麗層霄
兵麾滿眼歸無處愁絕秋風柳萬條

葉杞

字南有京口人讀書負才智初建德守以掾辟不
赴兵興後進士及第會李國鳳經略南土密陳時
事十條李嘉納所言遙授丹徒縣主簿將別有委
任而事權不復自由矣築別墅於吳淞以老焉

感衷二十四韻

貢賦通重譯耕桑被九垓歎驚氛侵滿不謂歲時催丞

相興師出綸音降使開紫泥封五采黃道繞三台奕奕
宣光業桓桓李郭才陣雲連朔野廟略定風埃香糯江
南餉葡萄隴右醅馬羣金匝匝毳帳雪毡毳劔動彭城
潰珠還臂社來長驅危破竹密令疾銜枚王者征無戰
羣雄勢欲摧忽聞君命召竟勒將旗回中夏捐雞肋丕
基隱鳩媒義聲從此逝銳氣一時灰天迴威弧弛城孤
畫角哀火狐翻嘯聚海鱷復喧豕歟附真遺患除封實
戲狹民情猶耿耿天討尚徘徊河漢明如洗崑崙豈易

顧孰矜黃鵠志羞上野鷹臺微效寧無念篇詩信漫裁
霜清野空濶獨立望蓬萊

王澤

字叔潤號青霞天台人僑居山陰嘗
為縣丞於華亭蓋平涼之屬邑也

寄友人

我本東海人家住東海頭自從卅角時便向西州遊邇
來西遊十九載夜夜思歸夢東海此身厭逐戎馬間落
魄唯存壯心在今年始欲向東還便將歸老天台山相

隨仙人養雞犬笑弄綠水桃花間
况聞溪上桃已熟
仙女嬋娟面如玉
春風綰結綠雙鬟
舞腰解按山薌曲
去年羣仙遙見招
謂予自是王子喬
山中何嘗識酒禁
日爛醉吹瓊簫
昨日纔經四明道
故人相見驚絕倒
間關萬死得生還
顏色還同舊時好
忽聞天吳落海隅
到海要拾明月珠
大風三日撼天黑
海底吹折紅珊瑚
洪濤如山老蛟怒
白日江皋塞煙霧
仙山咫尺不得歸
目送冥冥鳥飛去
櫂舟惆悵却西回
側望仙山心欲摧
空

懷帝子芙蓉闕遙望中天兩玉臺愁來昏昏枕書睡呼
酒狂歌不成醉丈夫出處真可憐往往長遭不如意作
詩為謝丹霞仙金堂石室無清緣有心未罷歸來約更
待秋風海月圓

是時方谷真據溫台叔潤
阻兵不得歸故作此詩

徽宗畫瓶中桂花

玉色官瓶出內家天香誰貯月中花六宮只愛新涼好
不道金風捲翠華

小遊仙

中山千日酒初醒却愛玄都夜景清
起坐天門吹玉笛
月中珠樹起秋聲

董佐才

字良用曾膺徵辟負才名具居顏
曰釋耕所王逢有題詠見詩集中

題華亭朱孟辨篆冢詩卷

古初無毫楮羲畫何繇傳孰知文字理已具河圖前
神農洎蒼頡俯仰極人天穗書與鳥書初制分後先
龜麟錫禹時盤銘著湯年岐陽紀石鼓史攜獨稱賢
矯若蛟

龍蟠鬱若鎖鈕聯科斗聿行漆形體因自然一從孔壁
廢重為經籍憐秦相約攜古撰次蒼頡篇小篆遂名家
勁健含姿妍登封及詛神金石紛雕鐫下逮隸八分變
化如雲煙漢經煨燼餘文教仍敷宣保氏存六書學僅
纔九千揚雄纂奇字杜林解探研繼蹟非無人意象莫
不全偉哉許祭酒蒐羅歸簡編墜緒賴復舉後學知相
沿陽冰克遠紹鉉錯造其玄近代邵與周筆勢回奔川
華亭朱茂才好古喜欲顛一掃世俗書習篆忘食眠秦

望并之翠碧落兼新泉小者案間列大者屋壁縣生平
囊橐資多克買碑錢功淡學既精齒壯志亦堅池魚染
皆黑鐵硯磨將穿摹搨累萬番期差古人肩師法正在
茲什襲比蹄筌孫樵文自祭智永筆忍捐前修不我欺
我癖尤難痊嵯峨細林山上與浮雲連譬彼汲冢書函
之瘞其巔聚土封若堂劉石表為阡具陽碧樹交具陰
書帶緣山靈謹訶護有名如有仙揮洒人間者顯晦名
非偏寶劍蕃賈發玉柙蔓草纏何如篆冢光夜夜暎星

躔錢維善篆冢歌叙云雲間善篆俞允文撰崑山雜
咏疑其為陸友仁今据董詩乃知為朱孟辨也

高明

字則誠永嘉平陽人至正五年中第授處州錄事
辟丞相掾值浙省亂作解官寓鄞之櫟社入明初
召用以老
辭卒於家

題支離叟

錢塘門裏支離叟短髮蕭疎色黧垢雪霜歲晚結輪困
風雨年深增老醜挫葳糊解總無能欲與冥靈齊上壽
天公怒此怪且嬾勅遣神官下搜取勾婁吉利忽飛來

虎倒龍顛盡灰朽女蘿飄騰白鶴去琥珀迸裂青羊走
繁陰已逐謝仙車枯幹徒存韋偃手邇來好事猶痛惜
嘆息形模無復有寧知百年皆夢幻靜看萬變互紛揉
榮枯相尋無已時成壞有數元非偶南山誰信梓化特
昆侖俄驚桺生肘朝菌何曾閱晦朔槧樸那知避薪樵
全軀孰似櫟杜樹絜之百圍今在否人生根蒂不可牢
况為草木計近久野客空嘆倚江柵老奴謾泣瑯琊桺
寒煙落日西湖邊衰草荒廬園數畝不見當時鐵門限

春蚓秋蛇徒蚴蟻玄雲飛盡墨池空直寄亭前誰酌酒

陳安

字龜盟吳人詩句清逸好遊
江湖名流楊顧輩皆稱之

高大使吳淞歸興圖

楓落吳江白雁飛天涯遊子正思歸香消夜月青綾被
涼入秋風白紵衣江浦蒹葭含宿雨驛亭楊柳帶斜暉
分明記得西湖上載酒蘭舟近翠微

題高理瞻所藏小景圖

昔年為客楚江邊
雨霽江南二月天
楊柳畫橋深淺水
桃花春岼往來船
新篳白酒浮杯醖
旋買青魚出網鮮
因見此圖驚舊夢
東風吹面鬢蕭然

鄭昂

字處抑
永嘉人

次復齋登華蓋山

野老憂時淚不乾
海天低燕麥風寒
秦關土蝕銅牙弩
漢殿月明金井闌
共喜寇恂重借賴
自慚李愿未歸盤

江山如畫人如玉破帽空悲管幼安

林處士幽居

山籬短短逕斜斜屋子三間竹半遮歲饒無僧供菜把
天寒有鶴守梅花武陵流水非秦世姑孰青山落謝家
共約春暄草芽動杖藜攜酒踏晴沙

李存

字明遠一字仲公安仁人通敏淹洽見賞於公卿
三舉高蹈丘園皆不起其詩文傳世者曰瑛菴集

題王氏笑閨亭

笑者不必閒閒者不必笑能笑又身閒涉世何爾妙利
名浩於海好惡險成微躋攀有亡命憤鬱或大叫癡如
蟻旋磨饕若魚上釣不知歲月往已死復誰誚之子素
相聞磊落年尚少構亭頗軒豁勝概得其要幽花淡無
媚新葉光相照倚欄皆可樂百事弗前料嗟我玩陳篇
兀兀老蓬藿雙眉久不展有臂莫能掉山根晚雲薄誓
欲隨荷蓀倘子不疵瑕拂衣共登眺

美葛子熙

臨川葛生朴且文負擔有力能辛勤家貧妻死母又老
短窗挾策長云云忽思句讀送日月曷若江湖勞筋骨
高碑大碣處處有篆楷草行兼八分畫長院靜手自打
襟袂染煤常若熏旁搜遠取到川陝况乃閩浙江之濱
通都大邑逢好事羅列古雅踰璣纁相酬金帛不論直
豈比市井爭鈞斤收藏圖書家若府下者秦漢高華勛
春初過我因細論絕勝待食如牢犢四方達士一時見
野店濁醪常半醺顧余髮齒久希豁脫簡尚閒徒逢芸

何當一竹兩芒屨共逐溪山秋半雲

早起

短髮梳殘月輕裳試曉風無言渾似道多病欲成翁竹
簡聊千載藜羹亦萬鍾昂昂非自異瑣瑣得無同

甘復

字克敬餘千人至正間從張仲舉遊溪為所推
重入明初高蹈不出同里趙璠刺其集以傳

宿山家

木落秋滿山牕虛夜涼集風吹海月生露洗苔衣溼野

客愛清冷長瓢暝中汲

曉出西園由谷中歸

披褐涉西園煩襟散清曉微風動高樹零露下芳沼始
行幽谷中忽出青林杪流水漂餘花脩筠度啼鳥身緣
翠石廻思逐白雲杳負杖孤賞懷春闌綠陰悄

華幼武

字彥清無錫人家素饒於財師事陳方子貞為詩
戲題華稿曰黃楊謂其愛吟事而牽於家務如黃
楊之厄閨而不長也彥清即用
黃楊自命其集不以為戲焉

寄趙易牕高士慶雲岡上人

昨宵風雨釀春寒
曉色開晴露未乾
局定須尋李遠
杖藜還肯過蘇端
繡經坐榻呼龍守
點易虛窗倩鶴看
整假飛鳬挽飛錫
樵蘇不爨罄交懽

秋夜有感

澤國秋來夜氣涼
飄零猶自未還鄉
蟋蟀泣露梧桐井
絡緯縈風薜荔牆
咫尺故園千里夢
亂離華髮十年霜
仲宣樓上長回首
烽火連山欲斷腸

陶宗儀

字九成原黃巖人徙居松江別號南村峙嶇離
每以筆墨自隨晚歲躬耕作勞之餘時時休於樹
下有聞見摘葉書之貯一破盎滿則埋之樹根
累盎十數一日發之編為若干卷曰輟耕錄

南邨雜賦 六首

屋小長林束邨溪四水通睡因閒處熟愁向醉時空鵝
鴨春波綠牛羊晚照紅歲輸公賦足泚筆記田功
路直華亭谷林藏處士家葵菰浮雨甲秔秫吐晴葩埭
羽肥堪縛谿鱗巨易義客來畱共酌濁酒不須賒

甲第多荒址茅茨獨老翁杖藜山遠近舟楫泝西東暮
色蒹葭外秋聲絡緯中郊居端不惡此趣許誰同
槿樹成籬落松脂化茯苓閒開籠鶴柵時過狎鷗亭汗
簡修書史持杯閱酒經塵纓終不縛何愧草堂靈
江海謀生拙園田引興長徑分黃菊本池種白魚秧
筆營山竈橫琴坐石牀俗氛飛不到一曲水雲鄉
草徑牛羊熟雲林鳥雀馴九峰三可覽一室四無鄰
世治方為樂身安豈厭貧涼風北牕下未讓葛天民

西湖紀興

浩浩春波濶冥冥夜雨縣笙歌傳別館燈火隔疎煙作
客頻遷次傷時更可憐明朝晴未卜還是醉湖船

次韻夏士良戶侯

竹裏茅茨白板扉興來隨意卧牛衣天籠平野前山遠
水拍危橋過客稀釣罷得魚沽酒去雨餘種荳荷鋤歸
故人却在城南住日日清觴四座飛

曉起

豆苗引蔓上疎籬
桐樹吹花落釣磯
老我田園閒處好
故人書疏近來稀
挂巾蘿薜看雲起
沐髮滄浪待日晞
只怪平生詩癖在
形骸消瘦不勝衣

樂靜草堂為衛叔靜賦

屋繞芙蓉九疊屏
日長客去掩閒庭
巖花煖傍疎簾落
階草晴分汗簡青
溫火試香刪舊譜
汲泉煮茗續遺經
江南定有徵賢詔
太史方占處士星

次韻答楊廉夫先生


移家正在小斜川新買黃牛學種田
奏賦不騎沙苑馬懷歸常夢浙江船
牕浮爽氣青山近書染涼陰綠樹圓
樂歲未教鉶有粟全資芋栗應賓筵

夜坐

披衣散髮坐南榮漏點遲遲欲二更
風約沼萍雲影淡月栖徑竹露華明
石牀涼意浮珍簾寶鼎沈煙噴玉笙
世慮不關心似洗此身只覺在蓬瀛

宮詞題王叔明士女

大家妝著鬪時宜，等候君王看月嬉。
三十六宮清夜永，幽情不許外人知。



宋元詩會卷九十七

欽定四庫全書

集部

宋元詩會卷九十八

詳校官中書臣陸湘

主事銜臣徐以坤覆勘

總校官知縣臣繆琪

校對官中書臣嵇承志

謄錄監生臣胡宗高

欽定四庫全書

宋元詩會卷九十八

兵部主事陳焯編

萬石德躬

題陳希夷像

花項君王瓦棺冷柴家陵上西風紫殿前點檢不知名
醉眼摩挲睨周鼎白晝龍虎行天階紫微小星何僭哉
先生大笑出門去明日華山歸去來山色還如舊時好

流水小橋散芳草千載誰知驢背心芒碭雲淡入孤島
汴城幾幾汴水流江南江北數百州秦王未已晉王起
人間萬歲更千秋

棄婦吟

萬君有退宮人引一首曹選誤屬鮮于樞當移置此

上堂拜姑姑不語門外上車別鄰里命輕不敢怨他人
回頭却看房中女女子勿啼汝父賢必不嫁汝狂少邊
丈夫有心只如此蕩子情多無十年風吹柳花春日暮
鄰姬送上來時路父母俱亡門戶衰未到先愁兄嫂怒

歸來明鏡半無光
繡帶雙紅空斷腸
今夜無人看夫壻
雨打寒窗歸夢長

辛文房

蘇蘇小歌

東流水底西飛魚
銜得錢塘紋錦書
幾回錯認青驄馬
著處閒乘油壁車
鸚鵡杯殘春樹暗
蒲萄衾冷夜窗虛
蓮子種成南北岼
苦心相望欲何如

清明日遊太傅林亭

隔水園林丞相宅
路人猶記種花時
可憐總被風吹盡
不許遊人折一枝

楊子承

獨不見

窈窕一佳人
鉛華淨如練
臨風弄錦瑟
其音哀且怨
南鄰去乘鸞
北里效飛燕
小院落花深
閒庭芳草徧
日暮掩朱扉
如何獨不見

甘茂實

秋懷

秋雨種白髮一滴生一莖半為作詩苦半為憂天傾天
傾或可補詩苦終無成朝來覽青鏡何時再復生不如
原上草秋死春仍榮

馬臻志道

春日寫望

遠波重疊限空明淡拂生綃絕點塵半舸夕陽喧酒客
一樓寒色倚詩人早鶯懷舊隨時至芳草無情著處新

却憶城中有貧者杏花開盡不知春

山居

人事喧喧任奕棋青山數畝是歸期
分將藥草鋤雲種買得松杉趁雨移
老去故人多入夢愁來閒事總成詩
芒屨布襪身猶健十里沙堤信杖藜

野外

野外蕭條景更佳牧童將犢卧晴沙
白鷗長遶分魚市紅杏深藏賣酒家
倦向客程添懊惱老看春事厭紛譁

田翁也學青門隱料理荒畦自種瓜

秋日閒咏

西湖晴雨畫圖間坐倚闌干自解顏
無酒誰供千日醉有錢難買一生閒
草衰春色來時路鶴宿秋聲起處山
橫笛吹殘天又晚釣船燈火入蘆灣

徐天倪

擬古 三首

皎皎機上絲織為遊子衣遊子蕩風塵
素衣化成緇風

塵不可避四顧將何之豈不念潔白徒重翟子悲最哉
加澣濯河水清且漪

娉婷閨中女天質知自愛空懷蘋藻心日月苦行邁蹇
修意良勤遲遲如有待未嫁庸何傷失身將重悔

婉婉自結髮伉儷情誼淡夫征日易久魚雁成消沈自
憐鏡中貌衰白將駸駸有衣為誰薰有花為誰簪顧影
雖無儔秉心猶斷金青天縣明月照影不照人

黃伯暘

香奩曲

下階拜新月空庭夜如水相思隔千里未有團圓意

張淳

玉簪

開軒俯瞰碧雲衢白筆含香半吐鬚帶露折來何處可
膽瓶秋水淡如無

鮑仲華

過郝參政墓

茂林喬梓上千雲
葉葉曾沾雨露恩
萬古西山青不斷
鳥啼花落幾黃昏

顧濟

淵明畫像

無錢猶愛菊有酒即橫琴
萬石醉不了 一名閒到今
徑松存老節門柳積秋陰
人畫歸來像誰傳歸去心

施鈞

武昌南樓

鸚鵡洲邊艤客舟
憲君邀我上南樓
胡牀老子三更月
鐵笛僊人一曲秋
流水白雲吳夏口
西風黃鶴晉磯頭
如今盡屬王孫草
添得江南幾許愁

送人歸天台

君去丹山伴赤霞
慙分書劍各天涯
交情十載共為客
歸夢幾番回到家
一路暖雲蒸藥氣
半溪流水平桃花
黃庭好問長生訣
莫待秋風兩鬢華

送金華史學錄回永嘉雁蕩

青山洗盡泮宮塵三載琴書又問津
海濶正憐鷗去遠山深須遣雁來頻
沈郎風月詩俱瘦謝老池塘草自春
莫笑廣文官獨冷長安一日看花人

陳觀

題甄氏訪山亭

水流花落日生雲日靜風喧草欲薰
老去風流猶未減一丘一壑要平分

李仲淵

送錙宗道奉使日南

一介强于十萬兵，秋風持節使麟泠。
可容贊普窺唐壤，要遣莎車拜漢廷。
蜃吐瘴煙黎洞暗，鯨掀巨浪海雲腥。
元戎已辦安邊策，萬古千秋汗簡青。

張孔孫

風雨廻舟

風雨來時撥櫂歸，濟川心事有誰知。
停舟且做江湖夢，浪靜風恬未是遲。

盛景年

送胡正辭

春水淡無姿垂楊雨方綠送人南浦
岼飛下雙鸛鵲鵲
鵲羽衣短只過溪南宿征帆順風去
萬里隨鴻鵠趨名
莫憚勞既榮還慮辱賓階有富人清
論俱成俗東吳開
漕府郎吏明如玉時艱海亦枯莫盡
杯中醪

萬頃雲亭

浮雲海上來西橫太湖過散彩涵秋
汀垂陰入虛坐日

照天影移風吹浪紋破開窗綠樹間何人讀書卧

白鶴觀

幽逕松竹深人行陰露滴獨犬下階眠一嫗當山績旌
幢高殿閉鐘磬虛堂寂道士不相逢蛛絲縣素壁

遊鳳林飲周子順宅

芙蓉隔秋水水濱不堪採小階涼氣生空牆竹陰在杯
行日暮頻人情醉中改忽驚潮水來門前有東海

毛直方

擬古

高堂列綺席賓御何委蛇粲粲金芙蓉春葩照蛾眉檀
槽起清籟鐵撥絃鴟鷃祗聞筵中曲不聞曲中詞蕭蕭
青塚魂化作秋雁歸玉關去時淚點點溼朱絲豈知哀
怨情及此懽笑期彈者錦纏頭聽者金屈卮但令今人
樂不惜古人悲

妾薄命

妾肌如玉顏如花長看窈窕青山斜淡閨學成新婦禮

鏡鸞不與畱年華
昨朝東鄰栽嫁衣
今朝西鄰催結褵
自憐孤燈照春夢
年年風雨梨花時
不怨父母貧不恨
蹇修拙妾生賦命
自坎壈底用閒情
寫紅葉千絲萬絲
霜練光與誰織作
雲錦裳千針萬針
兩黼黻與誰佩服
朝明堂吁嗟妾薄
命薄命可奈何失
時還自羞失身羞
更多妾寧失時無
失身平生分定月
下繩但把貞心守
貞色肯信嬋娟解
誤人

秋感

宇宙百年身江湖萬里心世情高枕遠詩味閉門深白
髮銷窮達青山傲古今情知秋亦客何事感秋吟

漁父辭

二首

呼兒買米得新粳漁邨且喜見秋成今朝嘗新莫草草
好釣鱸魚來煮羹

谿橋竹邊有酒沽攜魚換酒滿蒹蘆篷頭月上不覺醉
自卷蘆葉吹鳴鳴

龐隆

余構山莊於苕溪棲賢山其前軒顏曰卧雲時時
江羅君緯以山長來泣安定書院云其家亦有
卧雲軒在麻源索余作卧雲歌

白雲悠悠徧空谷野人掃雲結茅屋茅屋門深歲月長
獨向此中睡正熟洞門沈沈春滿牀去來只在白雲鄉
睡甜不怕衣裳冷夢覺空餘枕簟涼須臾雲去無畱跡
門外落花紅覆石野人起來著雙屐孤鶴一聲四山碧
趙茂元

秋宵吟

平林薄暮風淅瀝黃金滿地秋狼藉新月出嶺光欲流
萬籟無聲夜寥閒誰家美人吹鳳簫彩鸞對舞摩青霄
欄干縹緲碧雲遠天風入骨涼蕭蕭銅壺冰寒銀箭澀
玉露滴空衣袂溼紅花落盡爐煙收幽懷耿耿生新愁
寒蟬啼碎人間秋

老牛歎

老牛帶月原上耕耕兒怒呵嗔不行癢瘡滿背股流血

力之不勝空哀鳴日暮歸家羸欲倒水冷其枯豈顆少
半夜風霜徹骨寒夢魂尚遶桃林道服箱曾作千金隄
負重致遠人所憐而今棄擲非故主飽食不如盜倉鼠
徐秋雲

漢武帝

萬戶千門禁漏遲建章花發錦成幃瑤池有信青鸞至
金屋無人白燕飛風起輪臺春寂寂露零僊掌月輝輝
樓前簫鼓繁華夢汾上年年只雁歸

唐明皇

太平風月屬三郎
羯鼓聲中思轉長
天子錦纏娛虢國
貴妃音律教寧王
人歸巫峽山空在
花落溫泉水更香
誰信蓬萊青鳥使
回來無語怨漁陽

楊弘道

空邨謠

淒風羊角轉曠野
埃塵腥膏血夜為火
望際光青熒頽垣
俯積灰破屋仰見星
蓬蒿塞前路瓦礫堆
中庭殺戮

餘稚老疲羸行欲倒問汝居空邨何以供朝昏氣息僅
相屬致詞難遽言往時百餘家今日數人存頃筐長鏡
隨日出樹木有皮草有根春磨沃饑火水土仍君恩但
恨誅求盡地底官吏有時猶到門

李道坦

春日行

東風入樹吹流鶯曉窗睡熟花冥冥美人窗間動曉思
鶯聲枕上提春情坐中日出花滿城城南春淡楊柳青

王孫不歸消息斷
溪閨無人春草生
草生猶有時
王孫何日歸
斜陽照流水
萬里長相思
東園三月花
爛開西園蝴蝶雙飛來
明朝蝶去春無主
閉門花落愁如雨

山中苦寒歌

溪山苦寒弗可居
門前積雪三尺餘
陰厓一夜石脫骨
寒溜萬瓦冰垂鬚
道人凍卧山之麓
暮爇松脂煮溪綠
山陰孤權期不來
夢入幽崖聞折竹
征西將軍持短兵
馳馬夜渡黃河水
關東諸將面欲裂
嚴光獨釣桐江側

吳 嵩

古釵歎

何年美人寶釵失
湔井沈泥汙玃璫
一朝拾得再揩磨
三回五回看歎息
雙鸞匹鳳兩股勻
終然汙色難為新
當時光瑩照頭上
有似桃李搖青春
今人不識古儀狀
寶釵雖好非時樣
為君插罷擁髻悲
物無貴賤皆隨時
車遙遙

車遙遙舟迢迢
斷送行人幾暮朝
車馳道路不停軌
舟

挾風波難住橈家中雖貧常在目每恨舟車苦相促但
行一日兩日程死生與君非骨肉瞿唐水淡蜀山高檣
傾轅折不憚勞何當萬里隨君去得似篙師與車馭

金德啟

紅梅

醉卧西湖處士家夢回惟見赤城霞總然冷艷隨春變
依舊疎枝映日斜姑射冰姿凝絳蠟羅浮雪骨換丹砂
北人慣在江南住猶說前邨有杏花

楊鵬翼

鞦韆

日轉華檐樹影偏
謝家庭院簇神僊
綵繩斜擘纖纖筍
畫板輕承步步蓮
弄玉未升霄漢上
綠珠先墮綵樓前
不知小逕殘紅裏
明日何人拾翠綰

李仲南

夜夜曲

玉窗結怨歌
幽絃絕鸞膠
幾時續銅龍
漏促春夜長

冷雨酸風亂心曲閒薰翠被鬱金香拂拭繡枕屏山綠
飛飛乳燕歸復遲寂莫流蘇帳前燭

梁彥中

春晝

溪水搖光動綵牆雲山倒影蘸霞觴一庭芳樹清陰薄
千尺遊絲白日長風細柳塘鶯語滑泥融花徑燕飛忙
乾坤俯仰窺難盡花柳無私種種香

張澄

春思

一春長作客連日苦多風野樹淒迷綠檐花黯淡紅愁
隨詩卷積囊與酒樽空巢燕如相識頻來草舍中

高思恭

岳陽樓待渡

楚水凝千里湘雲隔萬層城高秋浦月星雜夜船燈旅
況天誰管年光雁可憑殷勤淡山色相送過巴陵

方瀾

石門曉行

風高木葉脫從此曉寒新
積雨見初日遠山如故人
煙邨一葦渡野寺數家鄰
獨念行藏異沙鷗未我馴

秋夕有感

搖落秋漸晚露香籬下花
疎鐘出煙寺新月入人家
蛩語日夜急雁飛天漢斜
蹇余不能去塵世事如麻

過吳江

離離遠邨落晴不見炊煙
秋水漲無垠野舟撐入田
天

畱新稼穡人戀舊山川不待鴻飛定西風已肅然

黃誠性

讀文山集

三百餘年樂育恩晚從科目得斯人
崎嶇嶺海期年國零落羶毛萬死身
諸葛未亡猶有漢包胥欲泣更無秦
挑燈慷慨歌梁甫鬢髮蕭森愴鬼神

譚復

寄玉筍劉師服道士

玉筍峰頭玉作人梅花壇下讀丹經曉分露水洗明月
夜掃雲洲拾落星海鳥近傳鳬逕度泉琴誤許鶴同聽
何當謝却塵中鞅共倚松根劖茯苓

達德越士

雨花臺

漠漠平蕪碧蕭蕭亂葉紅褰衣上危石歌帽立西風日
月奔馳外江山感慨中他鄉對零落那放酒杯空

送欽上人遊錢塘

淮南來往熟惟我最相知年少堅持律心空不廢詩春
泉閒聽處野寺獨歸時遙想猿啼夜縣燈話所思

桂 瓊

八禽言

姑惡姑惡姑不錯姑惡何如小姑惡小姑譖妾生間言
遂令婦姑情分薄朝嗔暮逐去不辭珍鮭誰供膾誰斫
但願小姑他日嫁兒夫還遇惡姑如小姑

提壺提壺復提壺提壺沽酒何處沽彭澤公田誰種秫

臨邛女子羞當壚客來煮茶度寒夜杖頭不用縣青蚨
提壺提壺勸爾即緘口覆人居巢碎人首

婆餅焦婆餅焦阿婆製餅婦為爐爐紅火烈餅成炭婆
怒逐婦歸蓬蒿化為異物身羽毛至今銜怨語聲高婆
餅焦婦休逐少待來年新麥熟

脫布袴脫布袴人情好新皆厭故古來聞有韓昭侯此
日那逢廉叔度千需萬索杼軸空今年新衣在何處脫
布袴風雨寒脫衣容易換衣難

三箇半布積絲累寸盈尺度下機先製老姑衣忍使天
寒披故絮篋中止有半匹存征人書來索襦袴布已盡
秋又風妾身依然單過冬

不如歸不如歸山川良是人民非風波途路多險巇車
摧舟覆將安之穀城黃石待已久上蔡蒼鷹悔却遲不
如歸歸及早白雲滿地無人掃

泥滑滑暮雨瀟瀟暝雲結苦竹岡頭虎跡新黃蒿城外
人踪絕僕夫股栗步莫前瘦馬凌兢愁仆蹶泥滑滑何

時乾出門咫尺行路難

行不得也哥哥千呼萬呼奈余何黃陵花落暗春雨湘
江水淡生素波奮衣出門天地窄仗劍欲往旌旗多行
不得早歸來只今誰掃黃金臺

歐陽伯恭

題蘇武李陵泣別圖

祈連山前箭如雨渤海海邊羝不乳同是肝腸十九年
白髮君歸朝故主臣心有血一斗許亦欲隨君歸鸞鼓

五千健兒五千母臣若獨歸魂魄苦空將老淚寄君歸
歸拜茂陵墳上土

于

石

號介翁

感古引

建安天下如潰瓜一榻之外非吾家黃屋飄飄定何許
魚為龍兮鼠為虎老瞞詐力敢欺天朶頤羊鼎方垂涎
紫髯將軍一攘臂控荆引越三十里慷慨山東大耳兒
南飛烏鵲栖無枝草廬一語君臣契目中久矣無吳魏

堂堂大義凜不磨靈關劒閣爭嵯峨昨夜西南一星落
六尺之孤竟誰託渭水旌旗歸故都江上空存八陣圖
抱膝長歌出師表古柏蒼蒼為誰老

史紫薇

江南曲

風淒露冷江南岼瑟瑟寒波秋練練采蓮歌斷紅雲空
蘋葉蘆花結新怨鴛鴦鴻鵠俱可憐相呼相倚沙背眠
白頭漁父搖蒼煙一雙飛上枯樹巔

杜元

和王守之斷腸曲

桃花夾堤春水滑
權歌三疊行舟發
行舟去去東復西
幾度桃花二三月
花前一別一回老
相思日多歡樂少
君重黃金輕別離
黃金難買少年時

張鳴善

送人遊廬山

曾到匡廬境
巉巖際碧空
萬松無路入
一水與天通
白

鹿眠清晝晴猿嘯晚風洪厓如可約吾亦訪雲中

阮魯瞻

江橋樹

江橋樹荏苒年華暮迎得行人來送得行人去落葉成
秋風秋風在何處

劉珍

寄友人

相別豈不易相見良獨難迢迢白雲城渺渺羊角山夢

長覺道遠迹滯愁春殘知音況何許取琴為誰彈

連百正

釣絲風

短髮冷颼颼倚欄初下鉤
閒來片水外輕弄一痕秋
淺拂蘆花亂低分桺影浮
煙波清夢遠吹不到公侯

鄧或之

落葉

秋庭晝無人落葉自滿地
端居觀物化人生亦如寄
朝

聞鳴蟬悲夕已見其蛻歲晏共蕭條臨風發長喟

江橋樹

江橋樹日日斜陽暮春風吹落花半隨流水去花落有
盡時流水無盡處

甘立

賦得城上烏送客

月落城上樓烏啼樓上頭一啼海色動再啼朝景浮馬
鳴黃金勒霜滿翠羽裘烏啼在故處人生多去畱

古長信秋詞

輦路青苔雨後深
銅魚雙鑰畫沈沈
詞臣還有相如在
不得當時買賦金

吳王納涼圖

六月長洲水殿涼
酒酣揮袖倚新妝
芙蓉露冷秋雲薄
回首西風響簾廊

唐棣

溪上秋居

白蘋洲上白鷗飛欲學嚴光築釣磯鴻雁無多秋水濶
溪山雖好故人稀懶鞭羸馬侵星出且放孤舟入浪歸
老去每懷鄉里樂涼風吹滿芰荷衣

春波小隱

鴛鴦湖上春水生吳姬蕩槳春波平碧山隔樹遠莫見
白鳥近人渾不驚倚檻鉤簾閒把釣停杯度曲醉吹笙
舊時王謝風流在却笑窮途阮步兵

苕溪述懷

康莊道上謝輪蹄，只合歸來向此棲。
白鳥影邊漁艇小，青山堆裏酒樓低。
簾開野樹雲當戶，檐蘸春波屋枕溪。
今日水晶宮裏住，詩成不媿使君題。

寄題謝子翼晚翠亭

洞庭咫尺少經過，嵐翠霏霏晚更多。
風作雨聲鳴墜葉，雲垂秋影落滄波。
楓林賽社聞邨鼓，橘岼開船發櫂歌。
欲泛空明三萬頃，恨無題咏到陰何。

陳巖

錢選畫花

雪翁夙號老詞客亂後却工花寫生寓意豈求顏色似
錢塘風物記昇平

苟宗道

蔚州元氏怡齋

八元乃八龍嶷若瓊樹林難兄復難弟感激恩義溪室
家宛相好如鼓瑟與琴翩翩鴻雁行鏘鏘鸞鳳音二王
一品題價重雙南金終當仕虞廷藹然列華簪要在風

俗淳不異古與今他人有兄弟聚散如飛禽閱牆不相
能干戈日相尋尺布斗粟謠行路為傷心棠棣廢已久
角弓義湮沈因書怡齋詩以為友于箴

王思廉

壽陽妝圖

一聲白雁渡江潮便覺金陵王氣銷畫史不知亡國恨
猶將鉛粉記前朝

昭君出塞圖

黃沙堆雪暗龍庭馬上琵琶掩淚聽禦敵分明無上策
錯教紅粉怨丹青

張礎

汾亭古意圖

漢家宮闕白雲秋魏國川原過雁愁萬古松風一茅舍
不隨華屋變山丘

關山風雨圖

山氣凝寒雨不開江濤拍岸雪成堆漁翁慣識風波惡

天際孤舟已早迴

黃君瑞

雙燕吟

雙燕雙雙飛更復雙雙栖
穿花探水雙銜泥
檐前葺壘雙哺兒
春風一雙至秋風一雙歸
念爾失其雌故巢寧獨依
莫學里中輕薄夫
暮亡其妻朝納姬

孫元實

池中白蓮

藥宮夜涼張暑宴僊姝散花水晶殿霞綃中單雲錦緣
黃金為房玉為鈿翠旌導前寶蓋殿霓裳中序按未徧
一人素衣持羽扇頽然中立白玉弁羣姝被酒酡發面
冠佩頽然醉相盼彼我弁者色不變以口承露不肯嚙
終然貞白難為薦獨向西風抱清怨

黃庚

鶴林僊壇寺

古壇歸鶴杳野鹿自成羣嵐氣浮清曉鐘聲出白雲樹

穿僧屋老水到寺門分人世無窮事山中了不聞

夜坐即事

對景坐清夜蕭然鬢已華詩慳難就藁燈暗不成花
易醉愁邊酒頻歸夢裏家何時鋤舊圃學種邵平瓜

秋夕和呂講師韻

誰彈招隱操雲外伴清幽午夜山林月一花天地秋
經臺涼影淡禪榻古香浮不作蟾宮夢淒然憶舊遊

偶書

豪氣消磨盡攜書客海濱文章難遇主天地不憐貧家
室依劉表妻兒笑買臣彼蒼還可問吾道幾時春

夜坐

世事等輕雲遽廬寄此身青燈少年夢白髮異鄉人按
劍驚山鬼吞舟養谷神黃庭重讀罷吾得葆吾真

白州即事

一雨洗空碧江城獨倚樓山吞殘日沒水挾斷雲流燈
影溪邨夜鐘聲古寺秋西州舊遊地十載此淹留

採菊

籬東閒採菊三逕碧苔深曉露冷雙屐秋風香一襟餐
英供小酌嗅蕊伴清吟會得悠然處方知靖節心

脩竹東園宴客

二月韶光潑眼濃攜樽宴客小亭東酒當半醉半醒處
春在輕寒輕暖中拂檻柳添吟鬢綠壓闌花妬舞衣紅
晚來聽唱梁州曲聲繞吳姬扇底風

小酌

小酌園林酒半醺
落紅影裏惜餘春
插花歸去蜂隨帽
傍柳行來鶯避人
白髮尚為千里客
黃金難鑄百年身
何時歸賦滄浪水
浣我征衣萬斛塵

月夜登樓

玉宇澄清暮藹收
吟邊怕倚仲宣樓
寒蟾千里夜如晝
新雁一聲天欲秋
湖海誰青豪傑眼
風霜易白少年頭
更殘忽聽荒城角
吹老梅花總是愁

春陰芍藥

點滴檐聲溼徑雲翻階紅藥帶啼痕可憐花片都零落
雨露雖多不是恩

聞角

誰送寒聲入夢中遙知人在戍樓東明朝梅嶺花飛雪
未必都因昨夜風

一春

新綠園林雨過時黃鸝無語恨春歸楊花怕逐東風去
搭住闌干不肯飛

池荷

紅藕花多映碧欄
秋風纔起易凋殘
池塘一段榮枯事
却被沙鷗冷眼看

客懷

年年春暮客天涯
愁見東風颺柳花
自歎身如梁上燕
營巢長傍別人家

見雁有懷

滿眼西風憶故廬
親朋音問久相疎
年年江上無情雁

只帶秋來不帶書

江邨

極目江天一望賒寒煙漠漠日西斜十分秋色無人管
半屬蘆花半蓼花

閨情效香奩作

金鴨煙銷一字香滿懷春恨強梳妝看花又怕東風惡
偷隔紗窗看海棠

江邨即事

江邨暝色漸淒迷
數點殘鴉雜雁飛
雁宿蘆花鴉宿樹
各分一半夕陽歸

宋元詩會卷九十八